

COFNODION CYFARFOD CYNGOR CYMUNED LLANENGAN a gynhaliwyd nos Fercher, Gorffennaf 18fed, 2018 am saith o'r gloch

PRESENNOL

Alun Jones (Cadeirydd), O. Hefin Roberts (Is-gadeirydd), Edward O. Griffith, Wyn Griffiths, John Gwilym Jones, Robert M. Jones, Owi Lloyd-Jones, Dylan Llwyd, Catherine Ll. Morris, Erfyl W. Roberts, William B. Williams, Cyng. Dewi W. Roberts (Cyngor Gwynedd – Sylwebydd)

YMDDIHEURIADAU

Cyng. John B. Hughes (Cyngor Gwynedd)

Croesawodd y Cadeirydd bawb i'r cyfarfod a chynhaliwyd munud o dawelwch er cof am y diweddar **Gynghorydd Andrew T. Weir** – cynhaliwyd ei angladd brynhawn heddiw a chynrychiolwyd y Cyngor gan nifer o'r aelodau. Diolchodd Cyng. Dewi W. Roberts, fel ffrind, am gefnogaeth pawb yn ystod ei waeledd ac yn yr angladd heddiw.

1. DATGAN BUDDIANT PERSONOL

Datganodd Cyng. Owi Lloyd-Jones fuddiant personol yng nghais cynllunio C18/0584/39/CC – Torri coeden – Min-y-Don, Lôn Pont Morgan, Aber-soch, oherwydd mai ei gais ei hun ydoedd fel perchennog y safle; gadawodd y cyfarfod pan y'i trafodwyd.

2. CADARNHAU COFNODION

Cynigiwyd ac eiliwyd bod cofnodion y cyfarfod a gynhaliwyd ar Fehefin 13eg, 2018 yn gywir ar ôl cywiro nad oedd Cyng. Wyn Griffiths yn bresennol ynddo.

3. EITEMAU BRYD (Cadeirydd/Clerc) – Er gwybodaeth neu i'r Clerc weithredu. Ni chaniateir penderfyniadau

Ni dderbyniwyd dim.

4. CEISIADAU CYNLLUNIO

Trafodwyd y ceisiadau a ganlyn:

C18/0423/39/LL	Dymchwel tŷ presennol ac adeiladu un newydd yn ei le – Bryn Rhedyn, Bwlchtocyn [Cyflwynwyd sylwadau cyn cyfarfod heno – Cefnogir]
C18/0493/39/LL	Cais Diwygiedig i adeiladu estyniad a gwneud addasiadau yn cynnwys gosod ffenestri gromen – Hornblow Cottage, Llanengan [Cyflwynwyd sylwadau cyn cyfarfod heno – Cefnogir cyn belled â bod y ffenestri'r un arddull, h.y. 'ffrâm' o'u hamgylch]
C18/0506/39/MG	Materion a gadwyd yn ôl ar gyfer adeiladu tŷ annedd a ffordd fynediad newydd – Tir ger Gilfach Goed, Lôn Pen Cei, Aber-soch [Cyflwynwyd sylwadau cyn cyfarfod heno – Cedwir at yr un sylwadau a gyflwynwyd â'r

C18/0526/39/LL	cais blaenorol, sef gwrthwynebir oherwydd gorddatblygiad ar safle cyfyng, tu allan i'r ffin datblygu ac mewn man amlwg o fewn AHNE Llŷn]
C18/0551/39/LL	Estyniad ac addasiadau – 4 Cae Du, Aber-soch – Cefnogir
C18/0578/39/CC	Amrywio Amodau 6 a 7 ar Ganiatâd Cynllunio C11/1055/39/LL er mwyn diwygio cyfnod meddiannu gwyliau – Capel Bethlehem, Cilan – Cefnogir
C18/0582/39/LL	Torri dwy goeden sydd yn destun Gorchymyn Gwarchod Coed – Plot ger Gorse Bank, Lôn Pen Cei, Aber-soch – Cedwir at yr un sylwadau â gyflwynwyd â'r cais blaenorol, sef gwrthwynebir oherwydd rhoddir amod am reswm ac mae'r coed yn iach a rhan o dirlun hanesyddol ac etifeddol ardal yr Harbwr a Phen Bennar
C18/0584/39/CC	Dymchwel tŷ a ddifrodwyd gan dân a chodi un newydd yn ei lle – Pant y Wennol, Mynytho – Cefnogir
C18/0591/39/LL	Torri coeden – Min-y-Don, Lôn Pont Morgan, Aber-soch – Cefnogir, gan nad yw'n goeden iach ac y dylid gosod amod y plennir coeden aeddfed yn hytrach nag un ifanc yn ei lle [Datgan Diddordeb – OLI]
C18/0599/39/LL	Ffurio decing i'r blaen – Wharfedale, Lôn Rhoslyn, Aber-soch – Cefnogir
	Teras to i'r ail lawr – 4 Pen y Bont, Aber-soch – Gwrthwynebir oherwydd eu bod yn dai newydd y gwyddai'r prynwyr beth oedd eu cynllun wrth eu prynu ac y byddai'n ddechrau cynsail i berchnogion y gweddill wneud cais cyffelyb

5. MATERION YN CODI

a) Toiledau Cyhoeddus

Ni dderbyniwyd gohebiaeth bellach oddi wrth Bethan Hughes, Uwch Swyddog Ymchwil a Dadansoddeg. Yn yr un modd, ni dderbyniwyd dim oddi wrth Dîm Gwarchod y Cyhoedd na'r Gwasanaeth Cynllunio parthed toiledau caffi Marchros.

Cafwyd trafferth â drws y merched – gwelwyd rhai yn curo'r blwch derbyn arian a thorrwyd y darn a ddaliai'r gwahanol geiniogau tu mewn. O ganlyniad i hyn a'r broblem trydanol â'r clo 'override', gofynnwyd i beiriannydd Healthmatic ddod draw – daeth bore 'ma a dywedodd y cysylltai pe bai problem; ni wnaeth hyd yma. Yn ystod y cyfnod yma, talodd W. a G. Williams dâl mynediad y gofalwr (gweler cofnod 15. Cadarnhau Taliadau a Derbyniadau isod); diolchir i WBW am ei gymwynas.

b) Meddygfa Aber-soch

Gwerthwyd yr adeilad erbyn hyn ond, ni wyddys i bwy na beth yw bwriad y perchennog newydd.

[Gadawodd Cyng. Dewi W. Roberts y cyfarfod ar ôl trafod yr uchod.]

c) 10. Gohebiaeth: d) Cefnogaeth Gorfforaethol – Hunaniaith

Ceisir trefnu dosbarthu'r pecynau o amgylch Aber-soch yr wythnos nesaf.

ch) 10. Gohebiaeth: a) Un Llais Cymru: vi) Adolygiad o'r Sector Cynghorau Cymuned a Thref – Mae Angen eich Help!

Cynhelir sesiwn wybodaeth i randdeiliad yn Llandrindod ar Awst 15fed i rannu'r canfyddiadau cychwynnol ac egluro argymhellion y Panel.

d) 10. Gohebiaeth: b) Siôn Gwilym – Mapio'ch Cyngor

Fe'i derbyniwyd a'r anfoneb (gweler 12. Cadarnhau Taliadau a Derbyniadau isod) erbyn hyn ag awgrym o gwmni ar y we i'w argraffu; penderfynwyd holi'r argraffdy ym Mhwlheli am bris, ynghyd ag anfon copi o'r ffeil at y Cynghorwyr sydd â chyfrifiadur.

6. MYNWENT

a) **Barbio Clawdd Terfyn y Bwlch**

Derbyniwyd cais oddi wrth y contractwr torri gwellt am gael caniatâd barbio (credai na fyddai dim mwy na dau gan punt), gan fod cymaint o ddrain ac ati'n dod trwy'r ffens ac, o ganlyniad, yn achosi pynjars yn ei dorrwr gwellt; penderfynwyd caniatáu.

7. CAEAU CHWARAE

a) **Archeb Archwiliad Blynnyddol**

Cynhelir yr archwiliadau ar Orffennaf 26ain – cysylltir â G.L. Jones i ofyn pryd yn union y gosodir y darnau a archebwyd, gan obeithio y gwneir cyn yr archwiliadau.

b) **Cynrychiolwyr Cwmnïau/Amcanbrisiau Offer**

Derbyniwyd prisiau oddi wrth Wicksteed, G.L. Jones, Back on Track (traciau beic), Caloo. Ni chysylltwyd â chynrychiolydd PlayQuest fel y bwriadwyd yn y cyfarfod diwethaf; teimlwyd bod digon o brisiau wedi dod i law. Er sgwrsio â chynrychiolydd HAGS drannoeth y cyfarfod diwethaf a ddywedodd y dylai'r gweinyddwyr yn y swyddfa fod wedi cysylltu i drefnu dyddiad, ni wnaed ac, o ganlyniad, penderfynwyd peidio parhau â'r ymholiad. Trafodir y llythyr a dderbyniwyd oddi wrth rieni Ysgol Foel Gron yn yr Is-bwyllgor pan eir trwy'r amcanbrisiau.

c) **Paentio'r Offer**

Cysylltwyd eto â Melfyn Pritchard ac addawodd y crafi'r paent cyn i'r archwiliwr ddod ar (gweler a) uchod) Orffennaf 26ain.

[Gofynnwyd iddo ailbaentio lloches bws Parciau Mynytho hefyd, gan nad yw'r un a'i ddifrododd wedi ymateb i'r cais i'w adfer; cytunodd wneud hynny hefyd.]

8. CYFRIFON

a) **Un Llais Cymru – Paratoi Cyllideb 2018 – 2019 – Adroddiad Blynnyddol Drafft Panel Annibynnol Cymru ar Gydabyddiaeth Ariannol**

Trafodir y gydnabyddiaeth yng nghyd-gyfarfod Un Llais Cymru a SLCC yn Llandudno ym mis Medi – gobeithia'r Clerc ei fynychu.

b) **Cyflog y Clerc**

Ni chysylltwyd â Bacstal Pac eto – gobeithir gwneud yr wythnos nesaf.

c) **Archwiliad Ariannol – Mewnol ac Allanol 2017 – 2018**

Anfonwyd y ddogfennaeth i BDO erbyn Gorffennaf yr ail, sef dyddiad yr archwiliad.

ch) **Penodi Archwiliwr Mewnol 2018 – 2019**

Anfonwyd llythyr at Archwiliwr Cyngor Gwynedd i'w gwahodd fod yn Archwiliwr Mewnol y flwyddyn ariannol bresennol eto, ynghyd â diolch am gydweithrediad y swyddogion; bu'n ddiraferth iawn.

d) **Wayleave Cyn-westy'r Harbwr, Aber-soch**

Ni dderbyniwyd yr ad-daliad a addawodd ScottishPower ar gyfer yr uchod ar Fehefin 28ain.

dd) **Rhent Cae'r Plwyf, Mynytho**

Cysylltodd merch y diweddar ddeilydd a dywedodd y rhoddi'r rhent dyledus (£16.00) i'r Cadeirydd ond, ni dderbyniodd o hyd yma; penderfynwyd y gallai barhau â rhentu'r tir.

9. **MATERION CYNLLUNIO**

- a) **Materion yn y Gymuned/Ymholiadau Cynllunio/Gorfodaeth**
Ni dderbyniwyd gohebiaeth bellach am y siale/cwt yn Fronheulog, Lôn Garmon, nac am yr ymholiadau blaenorol a wnaed fisoedd yn ôl bellach – cysylltir â'r Adran eto.
- b) **Cynllun Datblygu Lleol ar y Cyd (CDLIC): Datganiad Ysgrifenedig**
Derbyniwyd copi cyflawn o'r uchod.
- c) **Apêl Cais Cynllunio Maes Carafannau Pant Gwyn Cottage Caravan Park, Sarn Bach, a Thirger Ty'n-y-Cae, Llangïan**
Derbyniwyd hysbysiad o'r uchod ac anfonwyd sylwadau'r Cyngor eisoes.
- ch) **Cynefin – Stád Cornwall, Mynytho**
Derbyniwyd gohebiaeth y gwerthwyd wyth tŷ erbyn hyn ac y deil Plot 2 ar ôl. Ychwanegir os na ellir ei werthu erbyn diwedd mis Medi, ceisir ei osod ar rent canolraddol, h.y. rhaid i'r unigolion gyrraedd y meini prawf a nodir ar safle Tai Teg.

10. **MATERION PRIFFYRDD A BWRDEISTREFOL**

- a) **Y Fach – Cynllun a Chyfyngiadau Parcio**
Derbyniwyd ateb i'r cwestiwn pam na ddefnyddir y peiriannau talu ar ôl eu gosod – materion cyfreithiol heb eu cwblhau.
- b) **Torri Gwair Ochr Ffordd**
Ni dderbyniwyd ateb oddi wrth y Gwasanaeth Bwrdeistrefol parthed yr uchod er y cysylltodd Alun Roberts, Peiriannydd Ardal Dwyfor, â'r Rheolwr Gweithredol iddo gysylltu'n uniongyrchol.
- c) **Gwerthu Ceir/Cychod/Tractorau yng Nghilfan Tre Warren**
Nid oes gwaharddiadau parcio yn perthyn i'r gilfan ac, o ganlyniad, ni all y Cyngor gymryd camau gorfodaeth yn erbyn perchnogion y cerbydau; gall unigolion wneud.

11. **MATERION HAWLIAU TRAMWY – LLWYBRAU CYHOEDDUS**

Hysbyswyd Dewi Wyn Owen, Uwch Swyddog Hawliau Tramwy, fod llwybr Fron Green yn wlyb iawn. Dechreuodd y ddau gontractwr dorri'r llwybrau.

12. **RHEOLIAD DIOGELU DATA CYFFREDINOL (GDPR)**

Deallwyd y derbyniwyd cydsyniad brenhinol i ddileu'r angen i gynghorau cymuned a thref benodi Swyddog Diogelu Data. Penderfynwyd cofrestru â'r ICO – credir mai'r gost fydd £35.00 (gweler cofnod 15. Cadarnhau Taliadau a Derbyniadau isod). Derbyniwyd copi Saesneg o'r polisïau sydd eu hangen (GDPR Cyffredinol, gan gynnwys Atodiad o Dablau Cofrestru Asedau Gwybodaeth a Chyfnodau Cadw; Preifatrwydd Cyffredinol, Rhybudd Preifatrwydd ar gyfer Gwefan) ar gyfer yr uchod oddi wrth siaradwraig y cyfarfod yng Nghaernarfon ac, er yr addawodd gopïau Cymraeg ohonynt at fis Mehefin, ni dderbyniwyd hwy. O ganlyniad i'r brys ar gyfer eu mabwysiadu, cysylltwyd â chlercod eraill a'i fynychodd i ofyn beth wnaethant hwy ac atebodd Clerc Caernarfon drwy ddweud y talodd ei Chyngor am eu cyfieithu a bod pob croeso i ni eu defnyddio. Yn yr un modd, cysylltodd Clerc Llanrug i ddweud fod pob croeso i ni ddefnyddio ac addasu ei ddogfennaeth yntau; penderfynwyd eu mabwysiadu ar ôl eu haddasu.

13. GOHEBIAETH

- a) **Un Llais Cymru (ULIC)**
- i) **Ymarfer Monitro Blynyddol ar y Côt Ymarfer Diwygiedig ar Faterion y Gweithlu – Y Côt Dwy Haen**
Llythyr dyddiedig Mai 17eg yn gofyn am ymateb erbyn Mehefin 7fed ond, ni dderbyniwyd o tan Fehefin 20fed.
 - ii) **Cyfeirlyfr Charles Arnold Baker**
Cynnig arbennig gan y cyhoeddwr – degfed argraffiad yr uchod i'w gael am hanner y gost arferol, sef £53.00 + £7.00 cludiant; penderfynwyd ei archebu.
 - iii) **Bwletin mis Mehefin**
Ni argraffwyd dim ohono.
 - iv) **Cynhadledd a Chyfarfod Cyffredinol Blynyddol – Thema: 'Rôl Cyngorau Cymuned a Thref i'r Dyfodol'**
Hysbysiad o'r uchod a gynhelir ym Maes Sioe Frenhinol Cymru, Llanellwedd, ddydd Sadwrn, Medi 29ain; neb am fynd.
- b) **Cyngor Gwynedd**
- i) **Cynnig Gofal Plant**
Cais i arddangos posteri i hyrwyddo'r ymgyrch uchod, sef annog teuluoedd cymwys gymryd eu hawl i ofal plant am ddim drwy'r cynnig Gofal Plant 30 awr a chynyddu'r nifer o warchodwyr plant er mwn sicrhau digonolrwydd.
 - ii) **Gwasanaeth Ieuentid**
Llythyr yn egluro'r drefn newydd ar gyfer yr uchod; penderfynwyd ei drosglwyddo i Bwyllgor Neuadd Aber-soch, gan mai yno cynhelir y Clwb Ieuentid.

14. DYFARNIADAU CYNLLUNIO

C18/0098/39/LL	Dymchwel cwt glan môr presennol a chodi un newydd – Cwt Glan Môr Ynys Fawr, Borth Fawr, Aber-soch – Caniatawyd ag amodau
C18/0283/39/LL	Dymchwel ac ailgodi tŷ deulawr newydd – Fferm Corn, Cilan – Gwrthodwyd
C18/0379/39/LL	Adeiladu estyniad, gosod ffenestr gromen yn y modurdy, defnyddio to fflat fel teras ac addasiadau – Pen y Môr, Lôn Golff, Aber-soch – Caniatawyd ag amodau
C18/0418/39/LL	Dymchwel tŷ presennol ac adeiladu un newydd ar yr un safle, ynghyd â datblygiadau cysylltiad bach – Cartrefle Bach, Aber-soch – Gwrthodwyd
C18/0421/39/LL	Adeiladu estyniad deulawr ochr, ynghyd ag addasiadau a gwelliannau i'r eiddo – Roslyn, Lôn Rhoslyn, Aber-soch – Caniatawyd ag amodau
C18/0431/39/LL	Cais Ôl-weithredol ar gyfer dymchwel ac ailgodi tŷ annedd, ynghyd ag estyniad bwriadedig deulawr ac addasu adeiladau allanol – Frondeg, Llanengan – Caniatawyd ag amodau
C18/0436/39/DA	Ail-leoli ffenestr to – 1 Bryn Llawen, Llanengan – Caniatawyd ag amodau

15. CADARNHAU TALIADAU A DERBYNIADAU

Taliadau

Cadarnhawyd talu cyflog mis Gorffennaf (Rh/S 002155) y Clerc, ynghyd â'r taliadau a ganlyn:

- a) Dŵr Cymru – £258.28 (Rh/S 0012151– Cyflenwad Dŵr a Gwasanaeth Charthffosiaeth y Toiledau)
- b) Siôn Gwilym – £18.00 (Rh/S 0012152 – Map o'r Gymuned)
- c) Casglwr Trethi – £1.49 (Rh/S 0020153 – Talu Wrth Ennill)
- ch) Williams a Williams – £198.00 (Rh/S 002154 – Dadflocio Traeniau'r Toiledau)

- d) W. a G. Williams – £37.20 (Rh/S 002156 – Ad-daliad Arian Mynediad Glanhawr y Toiledau
- dd) ICO – £35.00 (Rh/S 002157 – Tâl Aelodaeth)

Derbyniadau

- a) Toiledau – £386.90 (Tâl Mynediad – £36.20, £91.40, £71.50, £34.80, £12.00, £87.30, £17.30 a £36.40)
- b) G.D. Roberts a’i Fab – £160.00 (Bedd Newydd)

16. DYDDIAD AC AMSER Y CYFARFOD NESAF

Nos Fercher, Medi 12fed, 2018 am saith o’r gloch

